

Uumassusilinnit isumalluutit niuernermi ilisimatusarnermilu atorneri pillugit Inatsisartut inatsisaat

Kapitali 1

Siunertaa, atuuffia aamma nassuiaatit

Siunertaa

§ 1. Uumassusillit assigiinngisitaarnerat pillugu isumaqatigiissut naapertorlugu inatsisip siunertarai:

- 1) Uumassusilinnit isumalluutit Uumassusillit assigiinngisitaarnerat pillugu isumaqatigiissut naapertorlugu ilisimatusarfigineqassasut.
- 2) Ilisimatusarnikkut paasisatigut angusat atorneqassasut niuernermi iluanaarutigalugu iluaqutiginninniarnermut..
- 3) Kalaallit Nunaat uumassusillit tunngavigalugit iluaquteqarnerup pilersitaanit naammaginantumik pissarsissasoq.
- 4) Uumassusilinnit isumalluutit atorneqassasut avatangiisinut pinngortitamullu illersorneqarsinnaasumik.

Atuuffia

§ 2. Inatsit atuuppoq pineqartuni ukunani:

- 1) Suugaluartulluunniit uumassusilinnit isumalluutininik niuernermi aamma ilisimatusarnermi siunertarisanut pissarsiniartarnerit, katersuisarnerit, atuisarnerit pineqartunillu annissuisarnerit pineqarpata.
- 2) Misissuinermi ilisimatusarnermilu paasisatigut angusanik naqitanngorlugit saqqummiineq aammalu uumassusilinnit isumalluutininik patent´iliisarneq pineqarpata.
- 3) Pineqartunik niuernermi siunertarisanut allatigut atuinerit aammalu uumassusilinnit isumalluutininik piiaanikkut taakkuluunniit tunngavigalugit nioqqtissiat pineqarpata.

Imm. 2. Inatsit inunnit uumassusilittut isumalluutit atornerinut atuutsinneqanngilaq.

Imm. 3. Inatsit pinngortitami isumalluutininik nalinginnaasumik aamma teknologii atorragu iluaquteqarniarnermut atuutsinneqanngilaq, soorlu qangatut pisarnertut piniarnermik, aalisarnermik nunalerinermillu iluaquteqarniarnermut aammalu naasunik assigisaannillu pinnersaatissanik imaluunniit nerisassiassanik katersuisarnernut.

Imm. 4. Naalakkersuisut qinnuteqartoqareerneratigut immikkut akuersissuteqarsinnaapput inatsisip ilisimatusarnikkut siunertanut aalajangersimasunut atorneqarsinnaanissaanik.

Nassuiaatit

§ 3. Inatsimmi matumani makku ima paasisassaapput:

1) Uumassusilinnit isumalluutit: Uumassusillit sananeqaataasigut kingornuttagaasunik isumalluutit, uumassuseqartut taakkuluunniit pisataa suulluunniit, uumassusilinneersut ataatsimoortuisa ilaat imaluunniit uumassusillit avatangiisillu imminnut sunniuteqaqatigiittarneranni uumassusiliussinnaasut suugaluartulluunniit nunarsuarmioqatigiinnit maannakkut siunissamiluunniit iluaqutiginiarneqarsinnaasut naleqarsinnaasulluunniit.

2) Misissuinissamut akuersissut: Uumassusilinnit isumalluutit pissarsiniarnissamut, katersuisinnaanissamut imaluunniit uumassusilinnit isumalluutit ilisimatusarnikkut imminnut attuumassuteqarnerannik misissuinissamut akuersissut, pisariaqartinneqassappat kingusinnerusukkut niuernermit siunertarisanut atuisoqarnissaa siunertaralugu. Niuernermit siunertarisanut atuisoqartinnagu, tak. nr. 3, piumasaqaataavoq misissuinissamut akuersissuteqaqqaartoqarsimassasoq.

3) Niuernermit siunertarisanut atuineq: Uumassusilinnit isumalluutit nioqqutissiaasimasunik nioqqutissiorneq tunianiaaqqinnerluunniit aammalu uumassusilinnit isumalluutit pillugit taakkuluunniit tunngavigalugit patent-imik qinnuteqaatinik patent-iliissutinilluunniit tuniniaaqqittarnerit.

4) Niuernermit siunertarisanut akuersissut: Akuersissut uumassusilinnit isumalluutit aamma uumassusilinnit isumalluutit tunngavigalugit misissuinermi paasisatigut angusanik niuernermit siunertanut atuisinnaatitsissutaasoq.

5) Iluaquteqarniarnermut ingerlatseqatigiiffik: Suliffeqarfik, Kalaallit Nunaata uumassusilinnit isumalluutit pillugit piginnaatitaaffigisaanik Naalakkersuisut sinnerlugit nakkutilliillunilu aqutsisuusoq.

Kapitali 2

Iluaquteqarniarnermut ingerlatseqatigiiffik aamma paasisimasallit

§ 4. Naalakkersuisut piginnaatinneqarput Kalaallit Nunaata uumassusilinnit isumalluutit pillugit pisinnaatitaaffigisai atorlugit iluaquteqarniarnermut ingerlatseqatigiiffimmut amerlanerusunulluunniit aallaqqaatit akiliuteqarsinnaanissamik. Iluaquteqarniarnermut ingerlatseqatigiiffik pisinnaatitaaffigisanik niuernermit siunertarisanut tunngavigalugit aqutsinissamut kisermaassisinnaatitaanissamik tunineqarsinnaavoq. Naalakkersuisut iluaquteqarniarnermut ingerlatseqatigiiffit taakkulu ingerlatsinissaat pillugit sukumiinerusunik maleruagassisinnaapput.

Imm. 2. Kalaallit Nunaata pisinnaatitaaffigisaanik iluaquteqarniarnermut ingerlatseqatigiiffimmut aallaqqaatit akiliuteqarneq, tak. imm. 1, killigaavoq ukiuni qulini atuuttussatut. Naalakkersuisut piffup pineqartup piffimmut ataatsimut ukiut qulit tikillugit sivitsorneqarsinnaaneranik periarfissaqartinneqarput, tamatuma ingerlanerani angujumasat sukumiinerusumik isumaqatigiissutaasimasut piffup pineqartup iluani anguneqarsimappata. Naalakkersuisut aallaqqaatit akiliuteqarneq, piffissamik killiliisinnaaneq aamma angujumasat pineqartut pillugit sukumiinerusunik maleruagassisinnaapput.

Imm. 3. Naalakkersuisut iluaquteqarniarnermut ingerlatseqatigiiffik piginnaatissinnaavaat uumassusilinnit isumalluutit niuernermit siunertanut tunngaveqartumik nammineerluni atuiniansinnaanissaanik taamatullu uumassusilinnit isumalluutit Kalaallit Nunaat sinnerlugu niuernermit siunertarisanut atuinissamut atatillugu niuernermit siunertarisanut akuersissutinik tuniniaasinnaasarnissaanik, tak. § 10.

§ 5. Naalakkersuisut, pisariaqarsorigunikkut, misissuinissamut akuersissutinik qinnuteqaatit suliarineqarnissaannut atatillugu paasisimasalinnik ikiortissarsiorsinnaapput. Misissuinissamut akuersissutinik inaarutaasumik aalajangiineq Naalakkersuisunit isumagineqartarpoq.

Imm. 2. Naalackersuisut paasisimasalinnik toqqaasarneq pillugu maleruagassanik sukumiinnerusunik aalajangersaasinnaapput.

Imm. 3. Naalackersuisut misissuinissamut akuersissutinik qinnuteqaatit suliaqartarnerannut atatillugu akiliuteqartitsisarneq pillugu maleruagassanik sukumiinnerusunik aalajangersaasinnaapput.

Imm. 4. Allaffissornikkut suliaasaartut pissutigalugit piumasaqaatigineqarsinnaavoq misissuinissamut akuersissutinik qinnuteqaateqarnermut atatillugu apeqqutinut immersuiffiliap pineqartumullu atugassiap atorineqartarnissaa.

Kapitali 3

Misissuinissamut akuersissutit

§ 6. Uumassusilinnit isumalluutininik ilisimatusarnermut imaluunniit malitsigisaanik niuernermit iluaqutiginiarnissaannut atatillugu pissarsiniartarnerit, katersuisarnerit misissuisarnerillu suulluunniit aatsaat pisinnaapput misissuinissamut akuersissummik pissarsereersimagaanni.

Imm. 2. Misissuinissamut akuersissummik tunniussisinaanermut atatillugu piumasaqaataavoq qinnuteqaateqartup Uumassusillit assigiinngisitaarnerat pillugu isumaqatigiissut malillugu uumassusillit sananeqaataasigut kingornuttagaasunik isumalluutit niuernermit iluaqutiginiarnissaannut maleruagassanik malittarininnissaa aammalu Naalackersuisut uumassusilinnit isumalluutit pillugit pisinnaatitaaffiannik ataqqinninnissaa.

Imm. 3. Naalackersuisut taamatut qinnuteqaateqartoqarpat niuernermit atuisinnaatitaaffususaanngitsumik misissuinissanut atatillugu misissuinissamut akuersissuteqarsinnaapput. Misissuinerit pineqartut tunngavigalugit paasisatigut angusat kingusinnerusukku niuernermit iluaqutiginiarneqassappata, tamanna § 9 naapertorlugu aalajangersakkat aqutigalugit pissaaq.

Imm. 4. Naalackersuisut misissuinissamut akuersissutit pillugit malitassanik aalajangersaasinnaapput, tamatumani pingaartumik pineqartillugit avatangiisit pinngortitallu sapin-ngisamik annertunerpaamik mianerineqarnissaat, sumiiffit katersuiffusussat pillugit aammalu uumassusilinnit isumalluutininik katersuisarnernut atatillugu suut peruserineqartarsinnaanerit pillugit malitassat, kiisalu nalunaarusiortartussaataanerit aammalu misissuinissamut akuersissut tunngavigalugu ilisimasarilikkat piginnaatitaassutisimik piginnittup nammineq atorniannigippagit Naalackersuisunut imaluunniit iluaquteqarniarnermut ingerlatseqatigiiffimmu piginnaatitaassutisimik tunniussisarnissaa pillugit malitassat.

Imm. 5. Naalackersuisut misissuinissamut akuersissuteqarnerminnut atatillugu, qinnuteqaateqartumut, misissuinissamik akuersissummumut atatillugu killissarititaasussat atuinissallu pillugit, eqqartuussissutigoortumik nammineq isumaqatigiissummik isumaqatigiissusiorsinnaapput.

Imm. 6. Misissuinissamut imm. 2 naapertorlugu akuersissut killilimmik piffissalikkatut tunniunneqartarpoq. Misissuinissamut akuersissutip atuuffia qaangiukkaangat akuersissut atorunnaartarpoq sivitsorneqarsimangikkuni.

Imm. 7. Uumassusilinnit isumalluutininik atuinermi sumiiffigisamik suunerannilluunniit allannguinerit suulluunniit, aamma katersuinermit peruserisat allanngortinneqassappata, taakku aatsaat pisinnaassapput misissuinissamut akuersissummik nutaamik pissarseqqaarluni.

Imm. 8. Misissuinissamut akuersissut naapertorlugu pineqartunik pissarsiniartarnermut, katersuisarnermut misissuisarnermullu aningaasartuutaasinnaasut qinnuteqaateqartumit

akilerneqassapput.

Imm. 9. Naalackersuisut imaluunniit aqutsinermut ingerlatseqatigiiffik, pineqartumut atatillugu piginnaatinneqarsimasoq, paasisutissanik pisariaqartinneqartunik piniarsinnaapput qinnuteqaateqartumut allanulluunniit.

Imm. 10. Misissuinermi atorneqartunik imaluunniit misissuinermi paasisatigut angusanik inummut allamut tamakkiisumik ilaannakortumilluunniit tunniussineq atugassiinerluunniit suugaluartoq aatsaat pisinnaavoq Naalackersuisut pineqartoq pillugu akuersissuteqareersimappata.

§ 7. Naalackersuisut iluaquteqarniarnermut ingerlatseqatigiiffimmut ilisimatitsissuteqartassapput misissuinissamut akuersissummik kina tunineqarsimanersoq pillugu, taamaasilluni iluaquteqarniarnermut ingerlatseqatigiiffiup pineqartunik akuersissutinik niuerutigineqarsinnaasunik pisumasinnaasut attavigisinnaasassammagit.

Kapitali 4

Misissuisarnikkut paasisatigut angusanik il.il. saqqummiussisarneq

§ 8. Kinaluunniit uumassusilinnit isumalluutit tunngavigalugit misissuinermi paasisatigut angusanik taakkuluunniit ilaannik eqqartuisoqalersinnagu, kingusinnerpaamillu naqitanngorlugit saqqummiunneqartinnagit pisussaaffeqarpoq, pineqartut pillugit ilisimatitsissuteqassallutik Naalackersuisunut, taassuma ilisimangippagu, Naalackersuisut ilisimatinneqareersimasut. Pineqartunik naqitanngorlugit saqqummiineq allatigulluunniit tamanut saqqummiussineq taamaattoq pisassaaq Kalaallit Nunaata uumassusilinnit isumalluutit pillugit pisinnaatitaaffigisai ataqqillugit, aammalu Uumassusillit assigiinngisitaarnerat pillugu isumaqatigiissummi aalajangersakkat malillugit, innersuussutigalugulu pineqartut atorneqartut Kalaallit Nunaanni aallaaveqartut.

Imm. 2. Naqitanngorlugit saqqummiussat uumassusilinnit isumalluutit taakkuluunniit tunngavigalugit imallit assilineri Naalackersuisunut nassiunneqassapput. Apersuisarnertigut imaluunniit oqaasiinnartigut paasisat pissarsiallu Naalackersuisunut ilisimatitsissutigineqartassapput imaqarniliannngorlugit imaluunniit pineqartut pillugit naalisakkamik nalunaarusiaralugit.

Imm. 3. Naalackersuisut iluaquteqarniarnermut ingerlatseqatigiiffik ataavartumik ilisimatittarumaarpaat misissuinermi paasisatigut angusanik tamakkiisumik ilaannakortumilluunniit saqqummiussisoqassamaarnera allatigulluunniit atugassiissoqassamaarnera pineqartillugu imaluunniit nassaat eqqartuiffigineqarnissaat pineqartillugu. *Imm. 4.* Naalackersuisut imaluunniit iluaquteqarniarnermut ingerlatseqatigiiffik naqitanngorlugit saqqummiinissaq allatigulluunniit tamanut saqqummiussinissaq pillugit tunngavissianut tunngasumik eqqartuussissutigoortumik nammineq isumaqatigiissummik kikkunnulluunniit isumaqatigiissusiorsinnaapput.

Imm. 5. Naalackersuisunut kinaluunniit imm. 1 aamma 2 malillugit paasisutissiisussaataaasooq pisussaavortaaq misissuinermi paasisatigut angusanik, nassaanik taakkuluunniit ilaannik naqitanngorlugit saqqummiutilersaakkat pillugit patent-imik allatigulluunniit misissuinermi paasisatigut angusat illersuutissaannik qinnuteqalersaartoq paasisutissiinissaminik.

Kapitali 5

Paasisatigut angusanik il.il. patent iliisarneq

§ 9. Kinaluunniit misissuinissamut akuersissummik peqartoq, taamatullu misissuinissamut akuersissutini tunngavigalugu nassaani pillugu patent-imik qinnuteqarniartoq patent-iliiniarneq pillugu

Naalakkersuisunut paasissutissiisussaataavoq. Paasissutissaataanerup malitsigaa patent-iliinissamik qinnuteqaatip assilnera Naalakkersuisunut nassiunneqartassamat, kingusinnerpaamik patent ´iliinissamik qinnuteqarnermut atatillugu.

Imm. 2. Naalakkersuisut iluaquteqarniarnermut ingerlatseqatigiiffik ilisimatittassavaat kikkut paasisatigut angusaminnik patent-iliisoqarnissaannik qinnuteqaateqarniarnemannik, taamaasillugu iluaquteqarniarnermut ingerlatseqatigiiffiup niuernermit siunertarisanut akuersissutinik qinnuteqarumaarsinnaasut attavigisinnaasassammagit.

Kapitali 6

Niuernermit siunertarisanut atuineq

§ 10. Uumassusilinnit isumalluutiniktamakkunanngalu paasisatigut angusanik niuernermit siunertarisanut atuinnissaq sunaluunniit pitinnagu piumasaqaataavoq niuernermit siunertarisanut akuersissummik iluaquteqarniarnermut ingerlatseqatigiiffimmit pissarsereertoqarsimanissaa. Akuersissummik tunniussineq pissaaq niuernermit siunertarisanut akuersissutinik siusinnerusukkut tunniussisareernerit ataqqillugit.

Imm. 2. Niuernermit siunertarisanut akuersissummik qinnuteqaat iluaquteqarniarnermut ingerlatseqatigiiffimmut allaganngorlugu tunniunneqassaaq.

Imm. 3. Naalakkersuisut imaluunniit iluaquteqarniarnermut ingerlatseqatigiiffik tamatuminnga piginnaatitaasoq niuernermit siunertarisanut akuersissutip atornissaanik malitassat sukumiinerusut pillugit eqqartuussissutigoortumik namminneq isumaqatigiissusiorsinnaapput, taamatullu aamma patent-imik piginnittumut patent ´ip niuernermit siunertarisanut atornissaanik malitassat pillugit isumaqatigiissusiorsinnaallutik, tak. § 11.

Imm. 4. Naalakkersuisut iluaquteqarniarnermut ingerlatseqatigiiffik piginnaatissinnaavaat niuernermit siunertarisanut akuersissutinik tunniussisinnaasarnissamik, tamatumani aamma ilanngullugit atuinnissamik malitassanik sukumiinerusunik aalajangersaasinnaasarnissamik, tak. § 11. Naalakkersuisut iluaquteqarniarnermut ingerlatseqatigiiffimmut taamatut piginnaatitsinertik pisussaaffissatut tunniussinnaavaat. Naalakkersuisut niuernermit siunertarisanut akuersissutinik tunniussisarnermut atatillugu iluaquteqarniarnermut ingerlatseqatigiiffimmut aqutsinermut atasumik ilitsersuussisussaataapput. Naalakkersuisut taamatut nakkutilliinissamut atatillugu sukumiinerusunik maleruagassisinnaapput.

§ 11. Naalakkersuisut imaluunniit iluaquteqarniarnermut ingerlatseqatigiiffik tamatuminnga piginnaatitaasoq, niuernermit siunertarisanut akuersissummik § 10 malillugu tunisisoqartillugu akuersissutip atornissaa pillugu malitassanik sukumiinerusunik aalajangersaasinnaapput, assersuutigalugu akiliuteqartarneq, akuersissutit atuuffissaat, qanoq sivisutigisumik atuunnissaat, nalunaarusiortussaataaneq qaqugukkullu atorunnaarnissaannut t malitassat pillugit. Naalakkersuisut iluaquteqarniarnermut ingerlatseqatigiiffiup malitassanik pineqartunik aalajangersaasinnaannaanun tunngavissat pillugit maleruagassanik sukumiinerusunik aalajangersaasoqarsinnaapput.

Imm. 2. Niuernermit siunertarisanut akuersissutit pillugit akiliutissat naatsorsorneqartarput pineqartumut pissutsit atuuttut tunngavigalugit, assersuutigalugu akuersissutip qanoq sivisutigisumik atuunnissaa, atuuffissaa aammalu aningaasatigut iluanaarutigisassatut naatsorsuussat tunngavigalugit. Naalakkersuisut akuersissutinut akiliutigineqartartussat naatsorsorneqartarnissaannut atatillugu maleruagassanik sukumiinerusunik aalajangersaasinnaapput.

Kapitali 7

Nalunaarusiortoqartarnissaanik piunasaqaat

§ 12. Kinaluunniit misissuinissamut akuersissummik aammalu taamaattoqassappat niuernermit siunertarisanut matumani inatsit malillugu akuersissummik tunineqarsimasoq misissuinissamut akuersissut taamaattoqarpallu aamma niuernermit siunertarisanut akuersissut tunngavigalugit misissuisimanerit ingerlanneqarsimasut, allaaserisatut saqqummiussat assilinerannik aammalu niuernermit siunertarisanut atuisoqarsimasinnaanera pillugit nalunaarusiamik ukiut tamaasa nassiussisassaaq Naalakkersuisunut. Naalakkersuisut pineqartunit paasissutissat pissarsiat ilisimasanik katersuivimmut immikkut toqqakkamut aammalu iluaquteqarniarnermut ingerlatseqatigiiffimmuut ingerlateqqissinnaavaat.

Imm. 2. Misissuineq suliniummik pineqartumik naammassisaqarfiumngippat, imaluunniit allatigit pissuteqartumik unitsinneqarsimappat, Naalakkersuisunut nalunaarusiortoqassaaq. Nalunaarusiami nassuaatigineqassapput suliniutip pineqartup siunertaa, killiffia il.il. aammalu ingerlateqqinneqaaqqissinnaannginneranut suut pissutaasimanersut.

Imm. 3. Naalakkersuisut nalilerpassuk paasissutissat nassiunneqartut imm. 1 aamma 2 malillugit piunasaqaataasut tunngavigalugit suliaasimangitsut, qaqugukkulluunniit piunasaarisinnaassavaat nalunaarusiaq pissarsiarineqartoq aammalu suliat ingerlanneqarsimasut pillugit annertunerusumik paasissutissiisoqassasoq.

Imm. 4. Naalakkersuisut nalunaarusiaasartussat pillugit maleruagassanik sukumiinerusunik aalajangersaasinnaapput, aamma pineqartut imarisartagarisassaat, toqqorsimatinneqartarnissaat, toqqorsiveqartinneqartarnissaat pissarsiarineqartarsinnaanissaallu pillugit maleruagassat ilanngullugit.

Kapitali 8

Misissuinissamut akuersissummik/imaluunniit niuernermit siunertarisanut akuersissummik atorunnaarsitsineq

§ 13. Naalakkersuisut inatsimmi matumani aalajangersakkat malitassallu aalajangiussat pillugit pisussaaffimmik sumiginnaasoqartillugu misissuinissamut akuersissutinik aamma niuernermit siunertarisanut akuersissutinik atorunnaarsitsillutik utertitsisinnaapput.

Kapitali 9

Pisortat oqartussaasuinit suliat aamma naammitgittaalliutit suliarineqartarnerat

§ 14. Naalakkersuisut qinnuteqaatit matumani inatsit malillugu atuuttut pisortat oqartussaasuinit aalajangersimasumit isumagineqartarnissaat pillugu aalajangersaasinnaapput. Naalakkersuisut ingerlatsiviup pineqartup aqutsinissaa pillugu sukumiinerusunik maleruagassaliorinnaapput.

§ 15. Niuernermit siunertarisanut akuersissutit iluaquteqarniarnermut ingerlatseqatigiiffiup aalajangiinera tunngavigalugu tunniunneqarsimasut pillugit naammagittaalliutit Inuussutissarsiornermut Pisortaqaqfimmuut tunniunneqarsinnaapput. Naammagittaalliutinik tunniussisinnaanermut piffissaliussaq sapaatit akunnerinik sisamanik killeqarpoq, aalajangiinerup naammagittaalliutigineqartup qinnuteqartumut apuunneraniit naatsorsuutigalugu.

Kapitali 10

Pineqaatissiisutit

§ 16. Akiliisitsisoqarsinnaavoq ima pisoqartillugu:

- 1) Uumassusilinnit isumalluutunik misissuinissamut akuersissutininik pissarseqqaarani, tak. § 6, imm. 1 aamma imm.7, pissarsiniarneq, katersuineq imaluunniit misissuineq pisimappat.
 - 2) Misissuinissamut akuersissummik, misissuinermit atortussarsianik taakkuluunniit ilaannik imaluunniit misissuinermit paasisatigut angusanik, tak. § 6, imm. 10, tunniussinerit atugassiissuteqarnerilluunniit suugaluartut pisimappata.
 - 3) Uumassusilinnit isumalluutunik aammalu taakkunannga misissuisimanermit paasisatigut angusanik niuernermit siunertarisanut atuinerit suugaluartulluunniit pisut niuernermit siunertarisanut akuersissummik pissarseqqaarsimatinnani, tak. 10, imm. 1.
 - 4) § 8, imm. 1, aamma 2, aamma § 12, imm. 1 aamma 2, unioqqutinneqarpata.
 - 5) § 6, imm. 4, aamma § 11, imm. 1, naapertorlugit malitassatut aalajangersakkat qaangiinnarneqarpata.
Imm. 2. Unioqqutitsineq suliffeqarfimmit naalagaaffiup, Namminersornerullutik Oqartussat, kommunip imaluunniit kommunit akornanni suleqatigiiffusumit, kommunalbestyrelsit aamma nunaqarfinni aqutsisut pillugit Inatsisartut inatsisaanni § 64 malillugu pilersinneqarsimasumit, aktianik piginneqatigiiffimmit, (anpartinik) piginneqatigiiffimmit, piginneqatigiilluni ingerlatseqatigiiffimmit assigisaannilluunniit tamakkiisumik ilaannakortumilluunniit pigineqartumit pisimappat suliffeqarfik il.il. pineqartoq taamatut akiliisitaanissamik akisussaatinneqarsinnaavoq. Taamatuttaaq aalajangersakkat aamma atuupput unioqqutitsineq Namminersornerullutik Oqartussanit, kommunimit imaluunniit kommunit akornanni suleqatigiiffusumit, kommunalbestyrelsit aamma nunaqarfinni aqutsisut pillugit Inatsisartut inatsisaanni § 64 malillugu pilersinneqarsimasumit pisimappat.
Imm. 3. Matumani inatsit malillugu peqqussusiatigut aalajangersarneqarsinnaavoq aalajangersakkanik pineqartunik unioqqutitsineq akiliisitaanissamik akisussaatsiviusinnaasoq.
Imm. 4. Matumani inatsit malillugu peqqussusiatigut aalajangersarneqarsinnaavoq unioqqutitsineq suliffeqarfimmit naalagaaffiup, Namminersornerullutik Oqartussat, kommunip imaluunniit kommunit akornanni suleqatigiiffusumit, kommunalbestyrelsit aamma nunaqarfinni aqutsisut pillugit Inatsisartut inatsisaanni § 64 malillugu pilersinneqarsimasumit, aktianik piginneqatigiiffimmit, (anpartinik) piginneqatigiiffimmit, piginneqatigiilluni ingerlatseqatigiiffimmit assigisaannilluunniit tamakkiisumik ilaannakortumilluunniit pigineqartumit pisimappat suliffeqarfik il.il. pineqartoq taamatut akiliisitaanissamik akisussaatinneqarsinnaavoq. Taamatuttaaq aalajangersakkat aamma atuupput unioqqutitsineq Namminersornerullutik Oqartussanit, kommunimit imaluunniit kommunit akornanni suleqatigiiffusumit, kommunalbestyrelsit aamma nunaqarfinni aqutsisut pillugit Inatsisartut inatsisaanni § 64 malillugu pilersinneqarsimasumit pisimappat.
- § 17.** Naalackersuisut unioqqutitsisoqarsimatillugu isertut aamma atortussiaanngitsutigut pisinnaatitaaffiit pillugit taarsiissuteqartarnissamik aammalu arsaarinnissuteqartarnissamik sukumiinerusunik maleruagassaliorinnaapput.

Kapitali 11

Atuutilersinneqarnera

§ 18. Inatsit atuutilerpoq ulloq 1. december 2006 aallarnerfigalugu.

Namminersornerullutik Oqartussat, ulloq 20. november 2006

Hans Enoksen

/

Siverth K. Heilmann

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut